



Eqqissimatitsinermut Avatangiisinullu Ataatsimiititaliaq Inatsisartut

Una: Namminersorlutik Oqartussat Stockholmimi nunani tamalaani isumaqatigiisummut tunngatillugu Kalaallit Nunaannut nunamut nangaassuteqarnek atorunnaarsissagaat pillugu Inatsisartut aalajangiiffigisassaattut siunnersuut (UKA2022/124) pillugu ilisimatitseqatigiilluni ataatsimiinnissaq

Allakkap ulluaq: 15-11-2022
Suliap normua: 2015-11353
Allagaatip ilisarnaataa:
21668202

Postboks 1614
3900 Nuuk
Oqarasuaat: (+299) 34 50 00
Fax: (+299) 34 54 10
E-mail: pan@nanoq.gl
www.naalakkersuisut.gl

Eqqissimatitsinermut Avatangiisinullu Ataatsimiititaliap saaffiginnissutaanut qujanaq, tassanilu ataatsimiititaliap ilisimatitseqatigiilluni ataatsimeeqatigiittoqarnissaa qinnutigaa. Apeqqutit ataatsimiititaliamit nassiunneqartut matumani issuarneqarput, akissutinnik malitseqartinneqarlutik:

1. *Stockholmimi isumaqatigiisummut malittarisassanut unioqquitsinerussava, Avannaata Kommunia ESANI A/S-imut ilanngutinngippat, taarsiullugu eqqakkanik ammaannartumik ikuallaasaruni?*

Akissut:

Avannaata Kommunia ESANI A/S-imut ilaalinngikkuni, suli kommunip illoqarfiini nunaqarfiinilu tamani avatangiisinut peqqissutsimullu isumannaatsumik aaqiinnissani qulakkeertussaavaa. Avannaata Kommunia qanoq iliorluni avatangiisinut peqqissutsimullu isumannaatsumik eqqagassalerinerninik qulakkeeriniarnerluni nassuiaammik Naalakkersuisoqarfimmut nassiussissaaq. Avannaata Kommuniata avatangiisinut piunasaqaatit, kommuninut allanut aamma ESANI A/S-imut piunasaqaatigineqartut assingi naammassisussaavai.

Naalakkersuisuniit ammaannartumik ikuallaasarneq siunissamut ungasissumut aaqiissutissatut isigineqanngilaq. Eqqakkanik ammaannartumik ikuallaasarnermut immikkut ittumik akuersissutsit, maannamut Avannaata Kommuniannut tunniunneqartartut ingerlaqqissinnaanngillat ingerlaqqittariaqaratillu. Tamanna avatangiisit peqqissuserlu eqqarsaatigalugit isummiunneqarpoq. Tamatuma peqatigisaanik Naalakkersuisuniit naliliisoqarpoq, ammaannartumik ikuallaasarnissamut immikkut ittumik akuersissuteqartarneq Stockholmimi isumaqatigiisummi siunertaasumik naammassininnissamut tapertaanngitsoq.

2. *Naalakkersuisut naatsorsuutigivat, Avannaata Kommunia ESANI A/S-imut ilanngutissanersoq?*

Akissut:

Avannaata Kommunia ESANI A/S-imut ilannguteqqinnissaa Naalakkersuisunit inassutigineqarpoq. Avannaata Kommuniata ESANI A/S-imut ilanngunnissaq kissaatiginerlugu nammineerluni aalajangissavaa.

3. *Naalakkersuisut isumaqarpat, kommuninik oqaloqatiginninneq eqqaaveqarnermut tunngasoq naammattoq?*

Akissut:

Aap – Naalakkersuisoqarfimma akisussaasuusup uangalu kommunit eqqaaveqarneq pillugu ingerlaavartumik oqaloqatigaagut. Naalakkersuisoqarfik ukiumoortumik kommuninut tamanut avatangiisinut ulloqartitsisarpoq, tassanilu avatangiisinut eqqagassalerinermullu suliassaqarfinni unammilligassat aaqqiissutissallu oqallisigineqartarput. 2022-mi oktobarimi ukioq manna avatangiisinut ulloqartitsinerit Ilulissani ingerlanneqarput. Tassani eqqakkanik assartuussisarneq aamma nunatsinni ikuallaaveqarnikkut aaqqiissutissat nutaat pillugit Naalakkersuisoqarfiup, kommunip aamma ESANI A/S-ip akornanni oqaloqatiginnineq ingerlalluarterujussuuvoq. Tamatuma saniatigut oqaatigineqarsinnaavoq, Naalakkersuisut qaammatit pingasukkaarlugit kommuninik ataasiakkaanik ataatsimeeqatigineqartarmata. Qaammatit pingasukkaarlugit ataatsimiinnerit taakku avatangiisinut eqqakkanullu tunngassuteqarput.

4. *ESANI A/S-ip pilersinneqarneranut suna alla qinigassaava?*

Akissut:

Naalakkersuisut isumaqarluinnarput, siunissamut ungasissumut aaqqiissutissanit ESANI A/S-imi ikuallaasarnermut ataatsimoorluni aaqqiissuteqarnissaq pitsaanerpaasoq. ESANI A/S aqutugalugu illoqarfinniit nunaqarfinniillu eqqakkanik nuna tamakkerlugu ikuallaavinnut assartuussisarneq aningaasaqarnikkut nammaqatigiilluni aaqqiinissaq qulakkeerneqassaaq. Qanorluunniit ungasitsigisumut assartuussinissaq apeqqutaatinnagu eqqakkanik ESANI A/S-imut tunniussisarneq assigiimmik akeqassaaq. Nuna tamakkerlugu ikuallaasarnermi aaqqiissutissanik pilersitsinissaq Kalaallit Nunaannut tamarmiusumut aaqqiissutaasussaavoq. Naalakkersuisut eqqagassalerinermi anguniagaat suliniutaallu Naalakkersuisut Eqqagassalerinermut Pilersaarutaat 2020-2031-mi annertunerusumik allaaserineqarput.

Avannaata Kommunia ESANI A/S-imut ilaaniarani aalajangissaguni, suli kommunip illoqarfiini nunaqarfiinilu tamani avatangiisinut peqqissutsimullu isumannaatsumik aaqqiinissani qulakkeertussaavaa. Aamma Avannaata Kommuniata avatangiisinut piunasaqaatit, kommuninut allanut aamma ESANI A/S-imut piunasaqaatigineqartut assingi naammassisussaavai. Taamatuttaaq Avannaata Kommunia qanoq iliorluni avatangiisinut peqqissutsimullu isumannaatsumik eqqagassalerinernik qulakkeeriniarnerluni nassuiaammik Naalakkersuisoqarfimmut nassiussisussaavoq.

5. *Ammaannartumik ikuallaasarneq immami avatangiisinut qanoq sunniuteqarpa?*

Akissut:

Eqqakkanik ammaannartumik ikuallaasarneq siunissamut ungasissumut aaqiissutissaanngilaq. Ammaannartumik ikuallaasarnermi eqqakkat nakkutigineqanngitsumik tamakkiinngitsumillu ikuallattarput. Taamaattumik ammaannartumik ikuallaanermi aamma dioxin akuutissallu ajoqusiisinnaasut allat aniatinneqartut eqqakkat ikuallaavimmi avatangiisinut akuerisami ikuallanneqartarnerinut naleqqiullutik annerusarput. Ammaannartumik ikuallaanermi mingutsitsineq avatangiisinut siaruartarpoq, tamatumunngalu immami avatangiisit ilaatinneqarput, akuutissat nerisaqaqatigiinnermut katersuunnissaat ulorianartorsiorfiusarluni.

6. *Iluqautaassava Stockholmimi nunani tamalaani isumaqatigiisummut tunngatillugu nunamut nangaassuteqarnerup atorunnaarsinneqarnissaanut isumannaassuseqarnera utaqqillugu, pisussaaffiit malinneqarsinnaappat?*

Akissut:

Kalaallit Nunaat pinngoqqaatinik POP-inik, soorlu PCB-nik dioxin-inillu aniatitsinermik killilersuiniarluni suliniutinik arlalinnik aallartitsereerpoq. Tamatuma saniatigut teknikkimut tunngatillugu nalunaarusiamik kingunerisassallu pillugit allakkiamik, Stockholmimi isumaqatigiisummut tunngatillugu Kalaallit Nunaannut nunamut nangaassuteqarnerup atorunnaarsitsinerup kingunerisassaanik sukumiisumik allaaserinniffiusunik peqarpoq. Tamanna tunngavigalugu Namminersorlutik Oqartussat una: Namminersorlutik Oqartussat Stockholmimi nunani tamalaani isumaqatigiisummut tunngatillugu Kalaallit Nunaannut nunamut nangaassuteqarneq atorunnaarsissagaat pillugu Inatsisartut aalajangiiffigisassaattut siunnersuut (UKA2022/124) nassiuppaat.

Taamaattumik immikkoortup isummerfigineqarnissaata kinguarteqqinneqarnissaa Naalakkersuisunit inassutigineqanngilaq. Suliassaqarfimmi suliniutinik aallartitsisoqareerpoq, aammalu Kalaallit Nunaannut nunamut nangaassuteqarnerup atorunnaarsinneqarnerata kingunerisassai sukumiisumik misissuiffigineqareerput.

7. *Pinngoqqaatinik POP-init sunnerneqarneq inuup peqqissusaanut qanoq ilungersunartigiva?*

Akissut:

Pinngoqqaatinik POP-inik mingutsitsineq inuit peqqissusaannut sunniuteqartartoq ukiorpasuaru ilisimaneqareerpoq. Tamanna ilaatigut Stockholmimi isumaqatigiisutip pilersinniarneqarnerani nukiusimavoq, tassani Issittumi avatangiisinut ulorianaatilinnik mingutsitsinerup annikillisinneqarnissaa, aammalu pinngoqqaatit taakku Issittumi inunnt sunniuteqartarnerisa annikillisingaatsiarnissaa immikkut kissaatigineqarsimalluni. Pinngoqqaatit POP-it akuutissaapput ajoqusiisinnaasut arlallit, arriitsumik arrioriartortartut aammalu uumassusilinnut katersuuttartut. Pinngoqqaatit POP-it nalinginnaasumik immami uumasuni miluumasuni,

immami timmissani aalisakkanilu, inuussutissatut pingaarutilinni annertunerpaamik nassaassaasarpur. Pinngoqqaatit POP-it kræfteqalissutaasinnaappur, aammalu inuit uumasullu kinguaassiorsinnaanerinut ineriartornerinullu sunniuteqarsinnaallutik.

8. *Naalackersuisut naliliinerat malillugu pinngoqqaatinut POP-inut killilersimaarinninnermut suliniutaat naammappa?*

Akissut:

Naalackersuisut naliliinerat malillugu pinngoqqaatinut POP-inik aniatitsinermik killilersuinialluni suliniutit naammappur. Kalaallit Nunaat PCB-mut dioxin-imullu akiuinialluni suliniutinik ingerlatsererpoq. Tassalu Naalackersuisut isumaqatigiissut apeqqutaatinagu assersuutigalugu dioxin-inik akuutissanillu avatangiisinut ajoqusiinnaasunik allanik aniatitsinermik killilersuiniallutik aallussippur. Inissiaruarnik pisoqaanerusunik isaterinerni PCB-nik isumannaatumik suliaqarnissaq piiaanissarlul aallunneqartarpoq. Naalackersuisut 2022-mi aasakkut ikuallaavimmur nutaamur, ESANI A/S-ip Nuummi sananialigaanur avatangiisinut akuersissut nalunaarutigaa. Avatangiisinut akuersissummi ilaatigut dioxin-imik akuutissanillu ajoqusiinnaasunik allanik saliisarnerni avatangiisinut piunasaqaatit sukannersuuppur. Ikuallaavissap aappaani, Sisimiuni sananeqartussami ikuallaaviliaasinnaasunilul allani 2024-miit minnerpaamik avatangiisinut piunasaqaatit sukannersut naammassineqartussaappur.

Ilisimatitsiffiusumik ataatsimiinnerup nalaani apeqquteqartoqaqqipoq. Apeqqut matumani issuassavara, akissummik malitseqartillugu:

1. *Kalaallit Nunaanni sialuup ernganik misissuisoqarpa aamma misissueqqissaartoqarpa?*

Akissut:

Sialuup ernganik misissuisoqarneranik aamma misissueqqissaartoqarneranik ilisimasaqanngilanga. Matuma saniatigut ilisimatitsissutigissavara, erngup imigassap pitsaassusia aamma imermik pilersuiviit nakkutigineqarnerat pillugit Namminersorlutik Oqartussat nalunaarutaat nr. 63, 4. novembari 2021-meersoq tunngavigalugu erngup imigassap misissoqqissaarneqarnikuusoq.

Inussiarnersumik inuulluaqqusillunga



Kalistat Lund